

*Skirbi pa Clyde Harms*

# Celebrando Dia Mundial di Maestro 2013

**ORANJESTAD--** Dia Mundial di Maestro ta un indicativo di Unesco cu ta wordo observa dia 5 di october tur aña. E meta di e dia aki ta pa aprecia, evalua y mehora educadornan di henter mundo. Lo keda na otronan pa evalua y haci decisionnan cu kisas lo mehora nos educadornan ami kier recorda y muestra mi aprecio e aña aki na es nan cu a contribui na educacion. Di Juffrouw Merkies den prome klas na Julianaschool te cu Dr. Howard Stettler, mi profesor di Auditorio na Universidad di Kansas y tur es nan cu a para dilanti di klas di cursonan cu mi a sigui den mi bida. Nos tur tin nos maestronan ('juffrouw' y 'meneer' nos tabata yama nan na Julianaschool) of profesornan cu nos ta corda miho cu otro. Tal

bes ta pa e manera cu nan ta duna les of pa un incidente cu nos a experiencia cu nan. Por ehempel, mi tabatin un juffrouw cu tabata muestra señal di ta hopi nervioso. El a duna mi les di Ingles pa un aña, pero lo unico cu mi ta corda di dje ta cu un dia el a nota cu mi tabata haci algo prohibi y el a cuminsa dal mi wanta y te hasta scop mi. Ken por lubida un juffrouw cu ta scop un estudiante? Completamente diferente tabata meneer Redeker cu tabata semper calma y nunca tabata perde su pasenshi cu ningun estudiante. Meneer Redeker tabata duna les di Boekhouden y Handelsrekenen y alabes e tabata director di coro di nos scol. E tabata un persona stima na nos scol. Nunca ningun estudiante a bisa un palabra denigrante di me-

neer Redeker. Otro director di e coro, pero algun aña prome cu Redeker, tabata meneer Gehrels. El a organisa varios 'bonteavond' di Julianaschool na Teatro Rialto cu a haya bon acogido den comunidad. Meneer Gehrels tabata docente di canto y idioma Aleman. E ta es un cu a introduci korfbal na Julianaschool. Casa cu un dama di bon famia di Corsou, e tabata nos bisiña na Lagun pa algun aña. Lastima mente, Mr. Gehrels a wordo acusa di a haci coy fresco cu un mucha muhe den su klas y el a wordo mandado bek pa Corsou. Di tur e docentenan cu mi tabatin na Julianaschool, meneer Hoekstra ta esun cu mi ta corda cu mas aprecio pesar cu e tabatin un maña straño y repulsivo. Sinta dilanti klas, e tabata uza e punta di rubber di e 'aanwijstok' (palo pa indica riba borch) pa limpia su horeanan.

Meneer Hoekstra tabata un docente di wiskunde, natuurkunde y Ingles. Tur tabata materia cu ami tabata siña bon y semper mi tabata un di e miho den su klas. Algun luna prome cu nos mester a pasa nos examen final pa gradua na 1947, meneer van As, mi docente di idioma Frances, a bay bek Hulanda y meneer Hoekstra a tuma over pa e resto di e aña. Frances tabata e vak cu nunca mi no a gusta. Meneer van As tabata un bon director di e scol pero un docente hopi 'seco' cu no tabata sa con ta



conecta cu su studentenan ni con ta inspira of motiva nan. E dia cu Meneer Hoekstra a duna nos e prome les el a bisa mi cu e kier combersa cu mi despues di klas. El a bisa mi cu el a keda den shock ora cu el a mira cu mi tabatin apenas un 3 pa Frances y e no ta bay permiti mi haci examen asina. "Bo ta saca 8 y 9 den tur mi vaknan", el a bisa, "y mi no por tolera bo bay examen final cu un 3 pa Frances". El a exigí mi bin su cas tur diasabra mainta pa e por yuda mi. Contrario na hopi otro maestro cu tabata cobra bon placa pa 'bijles', meneer Hoekstra gradualmente uza su diasabra maintanan pa e siguiente lunanan pa ami por haya un 'voldoende'. Inspira pa e esfuersonan y preocupacion personal di meneer Hoekstra, mi tambe a cuminsa traha duro pa no decepcion su persona. Mi ta orguyoso

di por bisa cu mi a logra un 7 solido pa Frances pa mi examen. Por cierto, na Rutgers Preparatory School na New Jersey e docente di Frances a keda hopi impresionado cu mi dominio di e idioma y el a invita mi pa join e club di debate na Frances. Hopi aña despues mi tabatin e suerte di bishita meneer Hoekstra y su señora na nan cas na Hulanda y aya mi a uza e oportunidad pa gradici personalmente pa su contribucion extraordinario na mi formacion. Mi ta contento cu mi por record'e y honr'e publicamente awe riba Dia Mundial di Maestro. Leyenda pa fotonan. Esaki tabata e prome Juliana school caminda e autor a cuminsa na 1937. Cinco di e nuebe nan cu a gradua na 1947. Di RpaD. Helena Croes-der Meer d.f.m., René Arends, Alice Eman, Clyde Harms, Poppy Schouten-Ecury d.f.m. □

